



**Komunikadu Imprensa**  
**28 Feveiru 2022**

**JSMP realiza formasaun ba membru konsellu suku no comunidade fetu  
iha suku Lalisuc**  
**Prosesu kazu sivíl, krime, violasaun seksuál no lei sira sai kestaun husi  
partisipante sira**

Iha 09 Feveiru 2022, JSMP kontinua realiza treinamentu ba membru konsellu suku no comunidade fetu iha Suku Lalisuc, Postu Administrativu Pante-makasar, Regiaun Otónomu Oekusi ho materia “Demokrasia, Kna’ar órgaun soberanu, Partisipasaun públiku iha prosesu halo lei no Asesu ba Justisa formal”.

Partisipante sira ne’ebé partisipa iha treinamentu ne’e hamutuk ema na’in 20 (fetu 15 no mane 5) ne’ebé kompostu husi Xefe Aldeia, Ofisiál Polísia Suku (OPS), representante fetu, delegadu/a sira no comunidade husi Suku Lalisuc.

Treinamentu ne’e ho objetivu atu hasa’e koñesimentu membru comunidade fetu no konsellu suku sira kona-ba demokrasia, kna’ar órgaun soberanu, partisipasaun públiku iha prosesu halo lei, asesu ba justisa formal inklui direitu kona-ba liberdade atu asesu ba informasaun nune’e bele mellora liután sira nia serbisu iha comunidade. Antes ne’e, iha tinan 2021, treinamentu hanesan JSMP halo ona iha Munisípiu Baukau no Covalima.

“Treinamentu ne’e ho intensaun atu hasa’e koñesimentu membru konsellu suku no comunidade fetu sira kona-ba prosesu halo lei iha nasaun demokrasia, oinsa asesu ba justisa formál bainhira hasoru problema no hatene kona-ba direitu liberdade asesu ba informasaun,” dehan Sra. Ana Paula Marçal, Diretora Ezekutiva JSMP.

Materia ne’ebé fahe iha sesaun treinamentu ne’e mak hanesan demokrasia, kna’ar órgaun soberanu, partisipansan públiku iha prosesu halo lei, asesu ba justisa formal (direitu, lei, krime, kna’ar juis, prokuradór, defensór públiku/advogadu privadu no polísia) no direitu atu ho liberdade asesu ba informasaun tuir Konstituisaun.

Iha sesaun treinamentu ne’e partisipante sira antusiasmu ho materia sira no foti kestaun kona-ba prosesu kazu sivíl ne’ebé han tempu kleur, violasaun seksuál iha kazamentu laran, kazu krime sira ho natureza semi-públiku ne’ebé parte sira lori ba tribunál la liuhusi xefe suku no xefe aldeia no lei sira ne’ebé la kondis ho situasaun moris povu nian bele halo alterasaun ka lae.

Hatan ba preokupasaun sira ne’e, JSMP esplika tan katak violénsia seksuál bele akontese iha matrimóniu. Bainhira parte ida la pronto no hetan obrigasaun atu halo relasaun

Rua Beco Lakateu, Aldeia Manu fuik,  
Suku Colmera, Administrativu Vera Cruz  
Dili Timor Leste  
PoBox: 275  
Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

seksuál konsidera violénsia. Tanba iha situasaun balun nu'udar ema bele sofre moras, kole ka iha kondisaun seluk ne'ebé la permite atu halo relasaun seksuál. Relasaun seksuál saudável iha matrimóniu laran mak parte rua hotu prontu. Kestaun kona-ba prosesu kazu sivil la'ó kleur, JSMP esplika katak kazu sivil barak mak komplikadu, exemplu kazu disputa rai. Alende ne'e, juis spesífiku ba kazu sivil foin mak koloka iha tribunál balun no kazu sivil nu'udar interese individu ida ho individu seluk nune'e parte sira (rekerente ka rekeridu) mós tenke ativu atu cek iha sira nia defeza. Kestaun kona-ba krime semi-públiku ne'ebé nia prosesu la liuhusi autoridade lokál, JSMP esplika katak depende ba lezada/u atu rezolve sira nia kazu iha nivel suku ka iha tribunál tanba lezada/u mak iha lejítimidade atu prosesa nia kazu.

Kestaun kona-ba alterasaun ba lei ne'ebé la refléta kondisaun moris povu nian, JSMP esplika katak tuir prinsípiu lei nian katak bele halo alterasaun ba lei ne'ebé la kondis ona ho situasaun ka kondisaun povu nian. Alterasaun iha dalan rua mak amendamentu no ka referendum. Amendamentu signifika katak bainhira lei ruma la kondis ona ho situasaun ka kondisaun povu nian, orgaun lejizlativu sira hanesan Parlamentu no Governu direktamente ka liuhusi proposta ruma bele halo alterasaun. Maibé karik orgaun lejizlativu sira lakohi atu halo alterasaun maka dalan seluk mak uza sistema referendum. Signifika povu halo referendum (votasaun) atu muda lei refere.

Iha abertura, Xefe Suku Lalisuc, Sr. Hermelindo Lalisuc agradese ba prezensa JSMP nian iha sira nia suku hodi fahe informasaun sira kona-ba demokrasia no asesu ba justisa formál ba iha estrutura suku no comunidade iha nia suku. Xefe suku mós husu ba partisipante sira atu fó atensaun ba materia ne'ebé sei fó nune'e bele hadiak liután serbisu iha baze.

Entretantu Xefe Aldeia Padiae, Sr. Gaspar Naheten iha enseramentu treinamentu ne'e, rekomenda ba JSMP atu kada fulan tolu ka neen tenke halo sosializasaun kona-ba informasaun sira hanesan ne'e ba comunidade sira iha Oekusi tanba comunidade barak seidak iha koñesimentu kona-ba lala'ok oinsa atu lori sira nia kazu ba iha justisa formal.

Atividade treinamentu ne'e realiza ho fundus mai husi União Europeia, Parseiru Suporta CEPAD no treinamentu ne'e realiza husi JSMP.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)